

儒學警悟七集

第二冊 石林燕語輯

卷之五 詩集

五言古詩

五言律詩

儒學警悟卷之三

石林燕語辨卷之三

樞密使拜罷舊皆用麻皇祐中秋武襄嶺南成功迴高文
莊若訥爲使罷爲羣牧制置使武襄自副使補其闕止令
舍人院草辭自是遂爲故事

春明退朝錄漢乾祐中除樞密使始降麻本朝循之石
元懿罷爲僕射亦降麻然則罷而降麻非常制矣云拜
罷皆用麻豈後來遂爲例也狄武襄除樞密使自降麻
但高文莊罷止舍人院出告今云武襄自副使補其闕
止令舍人院草辭自是遂爲故事非也茶惇云熙寧中
呂公弼罷樞使詔今後樞使罷不宣麻

唐起居郎舍人皆隨宰相入殿預聞奏事仗在紫宸則立
殿下直第二螭頭即其拘處和墨以記事故號螭頭或曰
螭拘自高宗後前殿不奏事則二史固無所書矣本朝記

注初不侍立但於前後殿爲次使候上殿臣寮退面問所
嘗言書之然未嘗有敢告之者後始詔後殿輪日入侍崇
蜜初鄭丞相達夫爲史官復建言併前殿皆入並立於垛
殿雖存故事而奏對語略不相聞亦不敢自書惟經筵得
與講讀官並列嘉祐間賈直孺所請也

唐太宗每日仗退後宰臣議政起居郎執簡記錄高宗
時即隨仗便出會要言高宗朝會端拱無言非謂前殿
不奏事也國初起居郎舍人止是官名初不預史事亦
未有記注之名淳化五年始命梁周翰李宗諤分掌左
右史事更直便殿日奉內朝此云本朝記注初不侍立
但於前後殿爲次使候上殿臣寮退面問所嘗言書之
然未嘗有敢告之者非也至和元年八月知制誥賈黯
言陛下御邇英召侍臣講讀經史乞令修起居注官入

侍事有可書隨即記錄從之賜坐於御坐之西南後修起居注石揚休言陛下有所宣諭而臣坐遠不盡聞慮記錄有遺乃命侍立於講讀官之末此云惟經筵得與講讀官並列嘉祐間賈直孺所請非也

狨坐不知始何時唐以前猶未施用太平興國中詔工商庶人許乘烏漆素鞍不得用狨毛暖坐則當時蓋通上下用之矣天禧元年始定兩省五品宗室將軍以上許乘狨毛暖坐餘悉禁遂編定制令文臣自中書舍人以上武臣節度使以上方許用而宗室將軍之制亦不行矣

太平興國七年翰林學士承旨李昉等奏商賈庶人有僭乘銀裝鞍勒狨毛暖坐等請禁斷從之當時以爲僭則非通上下用之矣今著令諫議大夫以上及節度使曾任執政官者許乘狨坐此云文臣中書舍人以上武

臣節度使以上方許用非也

參知政事班舊不與宰相同行至道中呂正惠公與寇萊公同爲參知政事正惠先相恐萊公意不平乃請進與宰相同行萊公罷復如舊

至道中當作至道元年

郭進守雄州太祖令有司造第於御街之東欲以賜之使盡用甌瓦有司言非親王公主例不應用太祖大怒曰進爲我捍契丹十餘年使我不憂西山豈不可比我兒女卒用之宅成以賜進進屢辭乃敢受太平興國中始別賜進宅或以爲因展修相國寺併入爲寺基也

郭進爲洺州防禦使充西山巡檢以備并寇太祖言進控扼西山十餘年使我無北顧憂我視進豈減於兒女此云知雄州又云捍契丹皆非

哲宗元祐初春秋尚少淵嘿未嘗語一日經筵司馬康講
洪範至又用三德忽問只此三德爲更有德群臣聳然康
言三德雖少然推而廣之天下事無不皆在上曰然

哲宗元祐閒但寡言耳非未嘗語也第九卷載所答蔡
持正語

太宗留意字書淳化中嘗出內府及士大夫家所藏漢晉
以下古帖集爲十卷刻石於祕閣世傳爲閣帖是也中間
晉宋帖多出王貽永家貽永祁公之子國初藏名書畫最
多真蹟今猶有爲李駙馬公炤家所得者實爲竒蹟而當
時摹勒出待詔手筆多凝滯閒亦有僞本如李斯書乃李
陽冰王密德政碑石本也石後入禁中被火焚絳人潘師
旦取閣本再摹藏於家爲絳本慶曆閒劉丞相沆知潭州
亦令僧希白摹刻於州廨爲潭本雜以五代近世人書微

出絳上希白自善書潭本差能得其行筆意元祐閒徐王府又取閣本刻於木板無甚精彩建中靖國初曾丞相布當國命劉燾爲館職取淳化所遺與近出者別爲續法帖十卷字多作燾體又每下矣

淳化官帖黃魯直秦少游所記皆云板刻此乃云刻石非也魯直云元祐中親賢宅從禁中借板墨百本分遺宮僚此云徐王府取閣本刻於木板豈各自一事耶續法帖跋云元祐五年四月十三日祕書省請以祕閣所藏墨蹟未經太宗朝摹刻者刊於石有旨從之至建中靖國元年四月二十三日内出緡錢十五萬趣其工以八月旦日畢釐爲十卷上之此乃云曾丞相當國命劉燾別爲續法帖十卷非也

宣徽南北院使唐末舊官也置院在樞密之北總內諸司

及三班內侍等事國初與樞密先後入敘班蓋視二府一等也每除樞密先爲使者必辭請居其下而後從之熙寧間始詔定班樞密副使下元豐官制行猶存不廢自王拱辰改除節度使遂罷不除元祐間復置以命張安道後亦廢

宣徽使位樞密副使上至道三年周瑩請居其下從之遂爲例然熙寧三年宣徽使郭逵言故事參知政事樞密副使宣徽使以先後入爲序今請立其下從之則是例亦不一也此止云與樞密先後入序班不分別使副又不及參知政事非也又云每除樞密先爲使者必辭請居其下而後從之亦非皆如此也元豐四年十一月詔罷宣徽院見任宣徽使依舊自今更不除人元祐間馮當世亦爲宣徽南院張安道雖除不拜

職事官差除皆除目先下惟中書舍人宰相得旨朝退遣直省官召詣都堂面傳旨召試被命者致辭丞相謝之直省官徑引入中書省前期侍郎廳設幕次几案於中就坐少頃本省吏房主首持丞相封題目來即就試中書具食罷侍郎致茶果是日宰相住省俟納試卷始上馬翌日進呈除命方下蓋召試之制也有思遲不即就者往往過期或爲留內門然已不稱職矣嘉祐間有試而不除改天章閣待制者

咸平中黃夷簡曾致堯皆試而不除嘉祐七年司馬溫公旣試除知制誥力辭改天章閣待制黃曾雖試而不除非改待制也溫公雖改待制非試而不除也

韓門下維以賜出身熙寧末特除翰林學士崇寧中林彥振賜出身用韓例亦除翰林學士國朝以來學士不由科

第除者唯此二人

韓持國未嘗賜出身其餘翰林學士乃熙寧元年此云賜出身又云熙寧末皆非

唐制翰林學士本職在官下五代趙鳳爲之始諷宰相任園移在官上後遂爲定制本朝凡兼學士結銜皆以職名爲冠蓋沿習此例

此書第四卷云唐翰林學士結銜或在官上或在官下無定制此云唐制翰林學士本職在官下其說前後自不同也趙鳳乃端明殿學士此云翰林學士非也此書第四卷亦云趙鳳爲端明殿學士本朝凡兼學士結銜皆以職名爲冠第四卷又云唐以宰相兼昭文館集賢殿學士結銜皆在官下蓋兼職宜然本朝循用其舊云云前後未免抵牾

自兩漢以來謂中書爲政本蓋中書省出令而門下省覆之王命之重莫大於此故唐以後以同中書門下平章事爲宰相者此也尚書省但受成事而行之耳本朝沿習唐制官制行始用六典別尚書門下中書爲三省各以其省長官爲宰相則侍中中書尚書令是也旣又以秩高不除故以尚書令之資左右僕射爲宰相而左僕射兼門下侍郎以行侍中之職右僕射兼中書侍郎以行中書令之職而別置侍郎以佐之則三省互相兼矣然左右僕射旣爲宰相則凡命令進擬未有不由之出者而左僕射又爲之長則出命令之職自己身行尚何省而覆之乎方其進對執政無不同則所謂門下侍郎者亦預聞之矣故批旨皆曰三省同奉聖旨旣已奉之而又審之亦無是理門下省事惟有給事中封駁而已未有左僕射與門下侍郎自駁

已奉之命者則侍中侍郎所謂省審者殆成虛文也元祐間議者以詔令稽留吏員冗多徒爲重複因有併廢門下省之意後雖不行然事有當奏稟左相必批送中書左相將上而右相有不同往往或待之不上或退送不受左相無如之何侍郎無所用力事權多在中書自中書侍郎遷門下侍郎雖名進其實皆未必樂也

秦漢至唐有官名雖相沿而實不同者尚書秦官漢武帝使宦者典事尚書謂之中書故蕭望之謂中書政本又云尚書百官之本宜罷中書宦官也至成帝乃罷中書宦者置尚書魏武帝爲魏王置祕書令典尚書奏事文帝改爲中書令此云自兩漢以來謂中書爲政本中書省出令而門下省覆之又云尚書但受成事行之蓋漢魏所謂尚書中書者本出於一旦初未有門下省今

乃以歷代官名職制混而言之非也此卷內又云唐參知乃宰相而平章乃參佐之名

故事職事官以告老得謝受命即行不入謝辭爲其致爲臣而去也神宗初李少保東之自侍讀致仕上特召對延和殿命坐賜茶退偕講讀官燕餞於資善堂後數日李侍郎受繼去亦用東之故事召對賜宴二人皆英宗經筵舊臣故禮之特厚非常例也當時謂之二李東之文定公子素忠謹樂易受亦謹慎長者云

真宗朝張齊賢王嗣宗馮起致仕皆謝辭起乃自鄆入覲此云不入謝辭非皆如此也治平四年四月李東之致仕九月李受致仕此云後數日非也咸平三年翰林學士朱昂慶曆八年翰林侍讀學士楊偕皆以致仕召對賜宴又元豐七年文潞公旣致仕入覲仍賜宴則召

對賜宴非特二李也富鄭公謝致仕恩命云已蒙指揮
特放朝謝兼以病發無由暫至闕下一對天光

景祐中宋莒公爲知制誥仁宗眷之厚即除同知樞密院
事時王沂公爲相以故事未有自知制誥除二府者乃改
翰林學士明年遂除參知政事

宋次道作宋元憲墓誌云宰相俱罷二府更易將以公
爲同知樞密院事獨一執政留乃曰故事知制誥未有
柄任者命遂寢即召入翰林爲學士今按景祐四年四
月宰相呂許公王沂公參政宋宣獻蔡文忠皆罷獨一
執政留者乃盛文肅也元憲寶元元年三月爲翰林學
士二年十一月參政此云王沂公爲相又云明年除參
政皆非

唐參議朝政參議政事參知機務參知政事皆宰相之任

也參知政事蓋劉洎爲相時名唐初宰相未有定名因人而命皆出於臨時其後高宗欲用郭待舉爲參知政事以其資淺故令於中書門下同受進止平章事參知非參佐也蓋宰相非一人猶言共知爾而平章乃參佐之名本朝太祖始以趙中令獨相久欲拜薛文惠公等爲之副而難其名召學士陶穀問下丞相一等有何官穀以唐有參知政事對遂以命之不知此名本自高於平章事輕重失倫後遂沿習莫能改云

高宗以郭待舉爲長倩郭正一魏玄同並與中書門下同承受進止平章事上欲用待舉等謂參知政事崔知溫曰待舉等資任尚淺且令預聞政事未可與卿等同名自是外司四品以下知政事者始以平章事爲名此止云郭待舉未盡也

本朝以科舉取士得人爲最盛宰相同在第一甲者王文正榜王文忠宋莒公榜曾魯公王伯庸榜韓魏公文潞公劉輝榜劉莘老章子厚葉祖洽榜蔡魯公趙正夫惟楊真榜王禹玉韓子華王荊公三人又皆連名前世未有也自熙寧三年余中榜至今惟焦蹈榜徐擇之一人而已他榜亦未有登執政者

王文正榜進士三十八人初不分甲此云第一甲何邪又章郇公亦同榜淳化三年丁謂王欽若張士遜皆第一甲但是年止兩甲爾

元豐既新官制四十年間職事官未有不經除者唯御史大夫左右散騎常侍至今未嘗除人蓋兩官爲臺諫之長非宰執所利故無有啟之者元豐末黃安中爲中丞久次神宗欲擢爲常侍會寢疾不果崇寧中朱聖予爲中丞嘗